

四庫全書

集部

欽定四庫全書

集部

弇州續稿卷八

七

詳校官編修_臣潘庭筠

中書_臣劉源溥覆勘

總校官進士_臣楊懋斯

校對官檢討_臣郭寅

謄錄監生_臣藍嘉瑄

欽定四庫全書

弇州續稿卷七

明 王世貞 撰

詩部

五言古

贈別邢氏

邢子愿按吳吳人德之而遷楚藩少叅以去不
佞尤有慨焉因成二章蓋比興之義勝云爾

三吳昔沴癘原野何歲蕤靈雨從北來為我日夜滋破
塊將作膏潤枯將作莩旱魃何相仇狂飈中奪之一展
衡巫雲再展七澤寶吳民泣相响焉用真宰為虛矣詛
楚言楚岷仍見私

其二

日余困邁軸上書方乞骸感君纏綿意報君繾綣懷北
風蕩征塵晝暝十二街我以為兄弟焉知虎與豺青鏡
光不虧浮塵焉見靈韶年負奇蓄勝際未詎涯樵衫黃

金帶紫蓋白鼻騮楚遊誠云樂和郢況不乖

袁母勞夫人六十

吾友袁汝南英英瑚璉器晚達仍坎軻才高遽傾棄少
寬黥婁橐未畢向平累七女僅一兒右軍邁全異矯矯
勞夫人為之代終事婚嫁悉以償廬產母中廢誨子必
義方不遷喻孟氏頭角俄斬然箕裘當有繼雅聞甲子
週軒冕光照地桑榆藹餘照松柏綿晚翠道韞無報客
賢聲自吳會

故將軍何維聖自維揚來禮曇師畢即出新編見
示斐然之感遂成四韻贈之

何遜在揚州輕舸訪婁許驃騎雅佞佛將軍不好武旃
檀裊猶馥牟尼炯還吐母使罔象求留之媚靈腑

送顧吏部遷山東臬副并託訪于鱗冢

顧榮江左彥藻翰復超絕一辭笠澤雲十倡鐘山雪水
鏡含春溫冰壺朗秋月時煩巨源啟遂佐東秦臬褰帷
風泱泱搖筆霜冽冽舊游三十年約畧為子說上有華

不注下有和郢骨微言猶若新與山鬪巖嶮吾子雖異
時同調必心悅倘表鄭公鄉千古偕不滅

余登第日一接故大叅甌東公二十年而遇公伯
子思堯君為賦曲池草堂詩又十七年而君之
子季輿來謁出新詩一編云將有遠遊且乞數
言之贈感舊懷賢情見乎辭

早識叅知公矯矯一世師東序懸鐘鏞西清列敦彝及
乎覲象賢宛然慨風儀奈何同阿閔一見忽失之接汝

通家刺誦汝幼婦辭舊感熱中腸新好溢鬚眉別業創
湖溪有無餘曲池答言九州慕焉係一壑私伊子論交
日是我挫名時敢誇大父行勿言丈人知

贈慧永叅五臺畢復禮落伽過訪有贈

上人宗門秀雙瞳剪秋碧夕踢瀉山鉸晨操趙州錫插
漢清涼臺截溟補陀石一見不再見欲得無可得吾意
且暫歸法堂草三尺

封戶部大夫次泉李德潤先生其先自關中徙豪

衛京師遂為京師人補博士弟子通經術有聲而不獲第有子今儀部君早達以其官封先生不色喜惟杜門讀書繕性而已儀部用直言獲譴先生不色憂旋被召遷今官迎先生養先生亦不色喜其夷然泊然者如故也弇州生聞之曰先生其有道者歟選部魏子曰以先生有道者則子之言徧天下而乃嗇於有道者何也辭弗獲已為古風一章歌以壽之

函右表地靈天京萃人傑英英李夫子徙豪自先詰三
藉方朔餘七工枚生發鴻都藝良就鹿鳴歌中咽束書
憐骭髀撫腹笑豁達慷慨捨類宮栖遲瞻魏闕伏櫪雖
已乖有駒早汗血粉署郎地官冰壺鏡秋月一登考功
最遂叅大夫末紫誥標義方烏紗冒宣髮閭里前為壽
雅非公所悅君恩固沈深汝職何瑣屑維時上台拆望
治羣志切雖更覆餗鼎未監摧莊轍桃李叢要津狐鼠
竄深穴寒素多失職膏腴轉軒揭御史一有陳襍被謝

朝謁維時雷霆下臣才理其說夫苟利社稷焉能避鉞
鉞天聽不為開物情轉成鬱槐簡拖綵衫引慝謝親闈
公為喜加餐汝志吾弗奪疇擁黃屋尊誰伏青蒲熟堂
堂中興代鳴鳳何寥濶既同臧洪日寧辭道州罰禦魅
夫豈遙無官自足活天心在仁直陰翳俄朗豁宣室既
生還絳灌亦心折金陵佳麗地建禮鵷鸞列試問三釜
隆胡殊菽水啜拄笏龍江霞曳杖雞阜雪有時指鳳游
翛然羨高潔氣養神自王意澹精不汨父道師友魚君

德天地埒我稱萬年觴蓋言不磨滅

二瑞篇為靖江朱生頌其令陳君也

陳君自臺出為靖江有異政而感甘露嘉麥之
瑞故頌也

皇靈大動變鼎席乃頻移天澤不自秘屯膏布宏施江
介有神君卓魯受良規欲觀馴雉化稍戢神羊威湛湛
秋夜零灑灑露未晞承之炯如玉味之甘如飴大地春
風來來牟亦吐奇同頌表一心共穗昭兩岐昔聞上元

令清心感恩滋復聞漁陽守異政假靈祗赫赫我仁君
斯瑞乃兼之祝君壽無疆惠我樂不支

蘭谷辭為沈子賦也

菀菀谷中蘭習習微風吹馨香自相媚焉用傍人知陋
彼靈均子九畹廣見滋被以大國名貢之白玉墀違性
離故土雖貴非所怡欲識幽人貞請聽蘭谷辭

李本寧兄過訪挾客曰來君者其名相如其字不
疑與談而悟則吾貞吉先生也喜而賦長篇贈之

本寧別燕中十見秋草白忽通應門刺使我倒雙烏鴉
鬢猶未蒼虬髯頓成赤寒暄未及展已進所攜客輕裕
乍飄颻朱輔吐溫哲曄然一顧盼光彩映羅幃姓疑護
兒後名自長卿得稍停見隆準夢語通促膝始悟自陶
徙翻稱范少伯縱復紫可憐寧奪南離色不戴遠游冠
却杖遠遊策黃鵠摩天來肯作樊籠翮剥棗溫濁醪展
歌恣懽喙牀頭挂君畫袖中出君跡神交復會面數載
今一夕却顧斗柄間參商當不隔勿問王孫歸所愁關

尹識

贈別陳從訓時余且入山矣

少年不見值晚合便成離以我絕絃際逢君納履時初
聽有心磬旋展無聲詩雲霧勿輕墮風流猶在茲還聞
金鰲背差堪笙鶴期

俞山人公臨卜築陽羨賦寄一首

京洛饒賢貴吳會富華腴雖復堪身筴要非中所愉仰
希上皇風俯卜靜者廬荆渚無濁流陽羨有幽區山自

離墨來溪由罨畫舒以茲畊蠶業不復廢詩書春問茶
女茶秋逐漁父漁朝饑拾野穗晚供剪畦蔬蓬累故何
滯鷄適當更餘竊從柴桑叟相為咏移居毋使車馬知
令汝蒼苔疎

曾舜徵令長洲有古循吏聲實而臺評當調作此
送之

伊余竄草莽忽忽末景馳間并有公言賢令將解龜忠
恕佩家訓三省日孜孜云何貝錦繁致此投杼疑圓魄

麗中霄纖雲來翳之迴光或不矚真體乃無虧膏雨垂
春布沮洳稱不宜寧為流潦故悔此天澤施即墨非吾
恨中牟竟而師追讐內逾密委運外自夷但使素絲存
寧受墨子悲勿以黃綬屈遽咏陶生辭泰二苟朋亡知
當未遐遺贈子幽谷蘭一佩三紉之清芬幸無故行當
被條颺

張助甫中丞自夏州遣信問存侑以三月俸曰為
米汁費報謝一章

上元之來夕有鴻自征羌中丞三月俸使者萬里糧上
言識區區下言結不忘書窮遞角見朱提爛生光冰雪
滿衡荆藹然自春陽日來不飲酒酒家無鸛鵲亦復不
噉肉屠門毋責償蹲鴟足飽饑懸鵲有餘棠念欲返君
嘉友道非所當西寺充檀越東鄰佐貧喪南陌飯芻芻
北渚成徒杠以此無住施為君彼岸梁竊聆叔則言載
佩原思章吾儒亦云云毋使廉惠傷

壽九房三仲季之母范六十

昔我伯父行魁然鄉耆宿生平恃豪舉晚始虞嗣續絡
秀來為偏熊羆瑞相屬鼎立丈夫子遶膝皆峙玉伯仁
故亭亭阿奴不碌碌季春壽筵開琅玕紛觸目始歌三
婦豔繼以將雛曲但誇河東鳳何論羈栖鵠不學西鄰
女幽蘭媚空谷

成化乙酉世大父郎中公捷留省遂破吾族天荒
今年復為乙酉而猶子士駟入太學應試恰與
大父同庚賦此期之

昔歲乙在酉伯祖尚書郎隻手探月脇一枝破天荒遂
令素士族重喚烏衣王冠冕蟬連來一百二十霜桑梓
有餘暉蘭桂無不芳汝生在庚申雅與伯祖當昔阻上
水灘今來順風檣汝父游成均不能掩夜光諸生皆避
席祭酒為下堂汝兄歌鹿鳴矯矯千人場餘祥發麟趾
勝事徵鴈行努力崇明德淮水日湯湯

元瑞計偕過吳入訪弇中留飲有贈

日予欲無言吟詠亦隨廢塞耳空谷中足音胡然至之

子匪俗歡夙昔申末契掩關二載餘日與黃卷對鹵莽
一世眸牢落千古事聖主御明堂汝乃隨計吏應門故
所習踉蹌手其刺一見肝膽披軟語若相媚中厨出旨
酒亦復饒異味鸞刀縷黃頷雕盤飮朱柿秋色在芙蓉
客醒主已醉四坐且勿驚見有此人未但誦子虛篇何
待楊得意

壽舊幕僚宜興吳君六十

我建襄漢牙君叅芙蓉幕皎鏡壺中冰昂藏雞羣鶴攝

邑貽邑思辭官鮮官橐擺脫墨綬榮經營寢丘薄溪山
相映帶心跡雙寂寞十味茗筍新兩收魚鳥樂素封亦
何道紅友時斟酌地僻日似年身閒夢不惡念子嗣嘉
遯所愧名未削遠信勤柿栗飽飧慰藜藿甲子君一週
精神迫如昨竊致三叟言用為千秋藥長作武陵人桃
花任開落

題鳳凰集圖為陳德清應名

鳳凰出丹穴萬羽相因依今者集君庭孤騫以徘徊匪

為聽簫韶毋乃攬德輝阿閣麗層霄雄鳴應朝暉肯學
潁川守終貽鵲雀譏

送喻隱雲先生歸常德

余學道七年矣而未有所得今年冬常德喻先
生自建昌來自言拜南嶽王薛二仙人之秘余
受而行之不三日而證奇妙種種不可殫述去
今而往唯有無思無為勿忘勿助而已先生別
矣余無以報先生願先生韜光隱跡必擇志士

仁人而後授之異日雲輶霓罕間不令猥雜致
罡風吹墮可也

清微大赤天往往多闕職欲鑄人間人去充蓋珠伯曇
師誕先登余乃甘蕉謫七載猶滯滛三環同棄擲幸逢
喻少君喜氣滿大宅銀海湛澄波玉池漱靈液傾蓋若
古歡披襟慶新得自云少無賴陸博恣酒色行尸鮮生
望立骨愴期迫偶從衡嶽歸乍迷襄城跡道逢二仙長
不飲亦不食揖我霧露中栖我石崖側蹲鴟餒我饑蒼

鮮分我席夜分仍見憐軟語相慰藉玄牝豈異門谷神
有真的一氣皎指南衆星皆拱北始若晉陽甲祛除靖
肘腋繼如時雨師九有成蕩滌鐵鼓以次開金輪長不
息坎離本天媾任督寧二脉九宮漸充盈百體各輕適
何必守庚申然後蠲死籍余意了不疑三宿而自獲方
欣順風拜忽杳凌空鳥邂逅成睽違倉皇悸心魄葉葉
雲四起亭亭鶴一隻宛宛武陵紅迢迢洞庭碧君擔日
月行遺余天地塞前因已小露後果莫輕悉大道故不

私元機帝深惜

栢溪翁寫竹妙得彭城墨派而不輕為人作以故
傳世頗鮮此紙僅以數枝寓意耳而姿態溢出乃
子尚書公刻之石摹本示余不勝仰止敬題于後
子猷愛此君不能一傳神誰為傳神者峭倩得其真前
有文湖州後有王舍人沈翁天機活不借丹青色盡吸
淇澳秋縮入文園墨披梢鳳尾振寫籜龍鱗坼興來兩
三枝勢若一萬尺翁乘葛溪杖轉叩湘君宅零落吉光

表片羽千金直幸有鳳沼兒摹之於樂石石能使竹壽
竹能救石頑遂令風雲氣長留天地間美牆莫深慕徒
益淚痕斑

輓七十六翁少和盛先生古體一章

秦人刺扁生曹公倖華氏念非邁克殘此曹會不死盛
翁擅秘方且復精名理肘有青囊書舌餘上池水出奇
不為恒所治人立起手診貧兒腕巷停富客軌義聲冠
當時顛癖亦爾爾昨歲冬仲朔衝寒過吾里宗戚若而

輩賴翁錫餘齒華筵簇高張鄭聲奏綺靡翁去不復顧
自抱琵琶妓風流一朝盡有樂它人餌七十六年春花
飛逐湍駛猶舉逸少云樂死勝二子為悰雖不同傷生
亦如此惜哉三仙翁制命不在己

咏碧蓮花初正碧久之則純白矣

苞莖色正碧碧如碧瑤冠舒英漸純白白勝白玉盤雙
成粧甫畢西母宴將闌醉馭群鶴苦雪翎盡摧殘

送印上人朝五臺

僧朝五臺去毛孔皆丈殊及乎五臺返丈殊為有無清涼即煩惱欲界是仙都吾愛仰山弟從他來意孤

譚道人自豫章來致宗良王孫詩一編為訂而序之復成茲章示宗良

客從西江來鯉魚銜雙結魚腹了不腥蘭芬中自發王孫天潢秀興詞何勃鬱奔騰失前輩擺脫謝時傑調古意必新才工理非別力迴彭蠡瀾欲表匡廬截四顧無當心徘徊取真悅敬禮昔杳然玄宴本虛劣笑此垂盡

軀為君千秋設

吾州趙僉事先生伯京自號震洋蓋即東海也先生官白下時白下諸名賢皆為之咏歌署題至圖畫其事四紀來則先生久游道山而諸賢亦無在者其嫡孫太學某出以示余不勝望洋之感因題短章於後而復志之

昔聞西竺言於東有震旦百谷萬古輸黏天浩無畔赤日蒸綺霞光彩交凌亂夫子鍾其靈少小富篇翰齊汨

搖地軸泓渟如星漢羣賢悉河伯恍然失其觀是以必
朝宗驪珠挹無算中乖仲尼志遂興魯連歎化鵬得逍
遙騎鯨歸汗漫焉覩雲氣中期羨不相喚

贈別胡生

晚途頗厭常胡生實竒絕磊落饒意氣昂藏秀風骨春
城喧吳趨絃管中夜發忽彈廣陵散寄思在寥濶冷然
中心賞焉能媚時悅無竽耻齊濫有璞甘楚荆少年易
窺人不為兒曹說

元日探梅前塢得數枝作

條風煦元正令我寬眉頭偶成探梅句遂作探梅游捨
策凭小僮柱頰枉前丘一點兩點疎千枝萬枝稠目境
固有殊會心並悠悠行人且莫折留媚我清幽

題朱上林所贈錢舜舉太白觀瀑圖後即還上林
匡廬萬古瀑太白千秋才兩奇偶相值後人何有哉及
展舜舉圖恍登文殊臺立起青蓮枯來聽萬壑雷始知
丹青力可以迴寒芳

其二

昔余賞朱生

上林父太學邦憲也

颯爽埒李白喉間白龍掛宛若

瀑布直此圖傳李神即呼朱亦得急還其家兒置汝高齋壁好待寒月來悠然想顏色

將赴留都司馬出門作凡四章

五十始加一脩然嚮巖居六十尋已三乃復就徵書一
念苟不堅百悔與之俱倦馬臨畏途十步五踟躕問我
何所戀問我何所須我亦無所須但顧我頭顱

其二

今辰復何辰二月吐嚴霜敝廬非我室故里非我鄉病
弟強中櫛病妻尚帷床小語報國恩勿作兒女傷出亦
以彷徨入亦以彷徨淚下如綆縻欲答不忍詳

其三

徘徊楊林陌顧瞻先人墓螭首松柏椒垂垂泣珠露王
綸既三沐瞑者忽若寤白首銜弓旌豈以浮榮故小欲
酬帝恩或可扶天步衰駑有如此終應問歸路

其四

曉步城南隅入辭導師廬戀此蘿竹幽愀然就徵車於
道豈有當供奉十年餘候吏滿河干旌旄溢川塗不知
為誰子顧我了若無雖垂箕頽尚恬憺庶未渝

遊攝山栖霞寺頗得泉石之勝因訪明徵君僧紹
故趾讀江令諸篇遂效其體

宿雨歛西昏翔陽舒東白松澗紛相悅溪喧若趨敵逆
遷叩山椒熹微露榜額焚香禮空王問飯得香積靈骨

吐雙圖佛螺現千碧興來不虛返緣源漸有獲飛泉激
冰雪餘韻鏗金石一線脂螳通雙崖巨靈劈如聞大士
音恍作海潮色徵君畢世栖冥心自樂國江令終宵憩
返念仍歛宅伊余迷晚徑一壑乖定力已慚戰勝肥虛
戀囂中寂逝言滌無明將從度公析

縱步攝山頗窮名勝有作

茲山實靈秀第鬱如團繖窈窕隙日穿半眠洩雲散忍
草屐不妨名藥囊堪滿湧漢勝垂乳疊石疑叢卵易窺

法王像難跡微君館忽有巖梅發如逢勝流款酌水當
醴觴撫松韻清管日昃不知歸焉顧足力短明發望臺
城戒徒心更緩

追和江令靜卧栖霞山房望徐祭酒作有懷趙祭
酒

夜靜絕梵唄地幽宿嵐陰警鶻振棲羽飛泉來遠音因
探作者詠時攪故人心講席鱣初俎經壇杏欲林西方
既中返北面敢希欽幸以衰遲感毋復望臣深

古意寄伯玉司馬

古道邈以乖雅尚人自疑日余與君子結髮媚清時棄
置何足言千秋以為期鄒律噓春陽被者尚參差見龍
雖在田文明光四垂鳳衰將何道六翮猶未摧逝將因
風往消搖於咸池

其二

金陵富英彥甲第亘中達短刺日夕馳跡往神不借寧
知塵中尚乃在黃山陲容城既壁隕濟南復蘭摧頽仰

宇宙間知己日以稀
紉袖雙鬱金三枯芬
漸衰幸其未為猶持
用表心期

答汪仲淹

日余栖崆峒九陽坐
晞髮承子問道言片
語不能答今者游金
陵雙騶日喧喝過耳
了不停當機時自發
真宰失玄珠寧為罔
象設頂生慕帝釋舉
念成一蹶有身亦何
患無生寧待說擺脫
有無關悠然得真訣

承大宗伯姜公少司
寇李公邀同大司寇
陸公少

司徒方公陟牛首山有述

金陵信佳地茲山仍麗觀標形自牛首遙勢應龍盤叢
楸入畫暝長松當夏寒雲梯界危漢梵宇繪層巒仰窺
象緯逼俯覺塵世寬江拖萬里練巖橫千仞丹追昔始
興議聊深冶城歎胡云表雙闕毋乃文偏安巨明一開
闢奕世乃勝殘文祖時駐蹕神孫此迴鑒天子自有真
奸萌焉得干雖雛鳳游園衍行鴻漸磐朱衫雜緇素白
社容簪冠方藉禹功大況值堯世難

將至祖堂過嶺返望牛首

脉從牛首來勝自茲嶺始足力雖小疲目境殊未已午
照蒼松巔千崖被紅紫恍如帝釋天鎔金飾睥睨色相
故以空羨心何緣起

祖堂

大道本無統茲統乃融師智巖敷五葉鶴林橫一枝任
爾黃梅發差強未熟時

泰和蕭京兆感異夢得地構樓甫成而拜勅命之

錫俾余以詩紀之

梁德一何長照灼光來裔八葉秉台衡餘休猶未替侯
其名家子通顯身自致傑構入幽夢奇徵協雄思武姥
當倚欄淇塘曲環砌雲霞鬱繚繞竹栢獻蔥翠燕賀客
席初鳳銜王綸至臣岡百稽首奉之踰六瑞山君日來
朝斗使夕相媚非由地靈藉詎表天文麗赫赫蕭京兆
食息銜恩賜

右司馬私署之允隅有軒三楹前列數石若岡阜

植以時卉一命觴觴之繫以長語

昔余圃離資壘石當軒牖間借凝霰崇暫收停雲黝麋
鹿性所便鷦鷯願毋負不謂志轉奢遂闢弁中畝莽蒼
跨隴植歷落排空阜却顧舊所棲曠若吞八九晝汎窮
淵源宵遊墮參斗主席或不冠客衣從短後易世非所
論此生畢吾有何意咫尺書遂奪匹夫守問我官何署
叨從司馬右問我居何所尚書巷西口既鮮履道竹亦
闕彭澤柳造物或見憐謂我癖如舊石頗餘數拳地僅

盈十肘敢煩離資較宛爾一培塿植以朝榮花聽雜野
生秀亭午初散衙欣然緩其綬尚兒致盤飧海兒捧卮
酒何必高軒過傀儡俄自稱壽人生百年內所值皆歸偶
安能歌五侯且復艷三婦却問洛城南金谷今在否

酬屠長卿談道

漢武招炎柄神威鞭八荒貴富無終極歡娛焉得長上
感西母精譬說將萬方靈藥點行尸非腐僅成僵太白
宦不達蓬累因風翔自云大還就毛骨皆靈香逍遙竟

八極婉姱凋三光采石一醉歸鯨背天茫茫得意失意
人於道皆有妨其言快人耳其事令心傷雲罕下璇霄
絳節麗朝霜下迎掃除者不問陶華陽栢葉瞿仙童遠
勝其師黃罔象獲玄珠智者空遑遑竅為聰明鑿羊用
岐路亡才鬼與頑僂其究安得當僂成故不頑才鬼淪
披猖余計業已失謀君安得臧不覩襄城轍大霧迷康
莊自非小兒言七聖俱彷徨

古體壽錢澹菴翁八十

昔人顏子淵於道實心冥一窺太山練遂爾銷神形乃
知元氣鍾厚薄良徑庭錢翁志聖學仰鑽無時停苦行
類攻玉雄談如建瓴類宮何煌煌三十薦明經四十歌
鹿鳴五十對虞廷予予郎署間拮据不遑寧真宰欲佚
之為汝匣青萍閒放雪溪棹或酺若下醺有時深玄觀
有時稱獨醒七袞古已稀况乃加十齡宛然兩顴紅上
映雙眉青勁翮凌秋空脩鱗縱大溟翁曰毋云爾我欲
固吾局不見衛武公大耋勤箴銘逸宕散真我多思鑒

性靈余有天一漿湛然殊清冷當此陶唐世為翁灌
奠

沈銀臺大樸園

隱侯賦郊居有圃非遠而春至百卉芬珍木鬱參差疇
為當心者名樸了不奇直上三百尺旁樛千萬枝雨雪
避瀾漫日月為蔽虧上覆柴桑廬下蔭中散池微風蕩
浮萍瑩作青琉璃時時手一編驕暘我何知返照自西
來胡床與俱移檉柳不盈把樵採來相欺豫章甫蔽牛

匠石已見窺人命故匪長巧者復鑿之請以莊生社咏
為大樸辭

余老乞骸而汝師大司成亦在告聊成一章問之
稱疾太學師真衰右司馬俱露乞骸章言尋故園社天
聽如許卑方舟問吳下桑榆我往苒松桂君瀟灑君以
道不行我豈行道者所念各杜門濁醪難獨把非繇惠
德音何以徵風雅

弇州續稿卷七

欽定四庫全書

弇州續稿卷八

明 王世貞 撰

詩部

五言古

恭謁太祖高皇帝御容有述

寶篋啟歲粧恍然覩天容恒嵩表隆準日月開重瞳彷彿御座傍雜沓繚雲虹我聞元運衰真人起隆中降自

帝釋天一掃烟塵空至今萬水流疇能不趨東匪覩胼
胝狀寧窺神禹功

恭謁成祖文皇帝御容有述

瑣瑣一蟣臣手叩玉京扉巍巍兩天人色奪金殿姿堯
彩既璀璨舜瞳復昭回飄鬣翹然舉儼若雙龍綏如日
麗璇霄九有皆光輝奚必須袁生始辨天子髭遺蛻燕
山陽游神沙漠陞

詠諸功臣像

故開國輔運推誠宣力武臣特進光祿大夫左柱
國叅軍國事太傅中軍右丞相征北大將軍魏
國公中山徐武寧王達

高皇挽天河手欲洗乾坤煙塵既蕩除萬古黃屋尊桓
桓徐魏公二十握橐鞬唾手縛僭王長驅定中原晝餘
耕桑地夜絕殤鬼魂赫奕奏凱歸屏營杜軍門勛超齊
尚父德遠韓王孫兩都對開國高棟亞天閭颯見英
標藹然眉宇溫

故特進榮祿大夫上柱國太子少保平章軍國重
事征北左副將軍贈太保開平常忠武王遇春
高皇下江南鄂公實軍冠喑鳴人盡靡跳盪敵中斷彭
蠡赭漢宮吳臺築京觀長驅搏燕都單于夜奔竄遂與
中山王功割天下半轅門落天星短造屈長算如礪身
後盟撫髀異時歎寂寂踰百年帝綸復昭煥

故開國輔運推誠宣力武臣特進榮祿大夫右柱
國征北將軍大都督府左都督同知軍國事曹

國公岐陽李武靖王文忠

神龍排丹霄雲表饒介鱗何況於曹公實托肺腑親弱
冠屏浙東氣欲吞吳人遺孽竄故都游魂蕩邊塵挺刃
躡虎穴六羸夜亡奔虜其名王歸駝馬百千羣珍貨若
山積籍之奉至尊帶礪表忠勲將與魏鄧倫易世隳家
汰繼絕荷皇仁

故開國輔運推誠宣力武臣特進榮祿大夫右柱
國大都督府右都督征西將軍同叅軍國事

衛國公寧河鄧武順王愈

衛公田家子神勇自天授十六冠軍鋒二十寄戎首洪
都既如磐襄樊同拉朽長驅掃中原曹宋相先後功大
心轉細爵崇以卑守西羌十萬帳一戰皆吾有轅門將
星墜悲聲咽刁斗武順以易名帝念良不負

故開國輔運推誠宣力武臣特進光祿大夫左柱
國大都督府左都督同叅軍國事信國公東甌
湯襄武王和

信公里閑舊臺托干城寄征行出必先遇敵堅始厲功
多冠徹侯心小取高位及乎瞿塘卻稍似失帝意終念
豐沛私遂爾同英衛晚途解兵柄稱病力不制所以恩
澤終賴宋乃反是

故開國輔運推誠宣力武臣特進榮祿大夫柱國
征南將軍西平黔寧沐昭靖王英

西平少沈勇親寄異諸兒三十二元樞遂副西羗師虜
其名王歸萬族盡纍纍六詔抗天權三帥張帝威賴川

首排蕩永昌翼推剡侯其寄留後剪棘撫傷痍一戰賊
膽奪七縱首心歸身沒擔王爵翼世秉公圭至今二百
年黃屋等崔嵬

故開國輔運守正文臣資善大夫護軍誠意伯贈
太師劉文成公基

有一冠貂蟬白皙美眉姿皎如張文成不愧帝者師元
厦將就傾良禽擇其枝一見寄帷幄再見參鼎司是吐
無不傾灼灼若著龜峻往鮮迴互巧者能間之終藉帝

恩深歸魄於山陲榮名施後代百世永不墮

故翰林院學士承旨知制誥宋文憲公廉

皇天厭元運英主革其物蕩雪萬象昏被之以黼黻宋
公始膺聘遂爾叅密勿一草十製成頓迴天顏悅遠增
雞林織近補龍袞闕青宮重師資抗表久始決金侈疏
傳賜詩榮賀監發覆水忽不收君恩長斷絕

故太子太傅嗣魏國公徐輝祖

中山既星隕嗣公乃霞升仁孫藉肺腑苟息為干城大

義當滅親一死以自明敢援椒風顧忘此板蕩誠捧心
見家王茅土幸未傾焉知百年後崇祀表芳名

故奉天靖難推誠宣力武臣特進榮祿大夫右柱

國太子太傅征夷將軍成國公東平朱武烈王能
文皇倡義旗百戰躬自將毋論大將誰偏裨皆稱良淇
公與成公雄武雅相當應敵面身倡勇人人強成公
實少年受賑闢南荒武侯未渡瀘伏波已告亡帝惓殊
深篤胙茅等真王至今東第中華棟鬱相望

故奉天靖難推誠宣力佐理武臣特進光祿大夫

左柱國太師英國公定興張忠烈王輔

河間建王畧中道乃摧折令子實繼之神武紹休烈已
懸徹侯印遂秉將壇鉞長驅掃南交富良波為血三縛
叛王歸干城歸版籍首發吳淠謀精誠昭日月晚辭北
軍柄遂冠坐論列輿尸豎子哉玉石同茲孽

故光祿大夫柱國少師兵部尚書華蓋殿大學士

贈太師楊文貞公士奇

長陵寄臺閣所拔凡七臣文貞一王官超等肺腑親青
宮借羽翼監國日咨詢遂令寰宇間雅歸儲皇仁師保
歷三朝夙夜奉一人間飾文雅觀未漓造化淳末路厄
權璫有志時屈伸終然保清白易名疇與倫

故光祿大夫少保太子太傅兵部尚書贈太傅于
肅愍公謙

熙世孽禍萌妖豎擅天綱時危鉅公出赤手障八荒三
十官司馬奄有梁晉彊煦若凌冬日凜若亢夏霜惟時

帝蒙塵群議沸蜩蟬獨公屹不搖大都自金湯九重借
頌笑百辟羨飛揚所以殺機發委命燕市場人定天亦
迴骨腐名更香

故榮祿大夫太子太保吏部尚書贈太保王忠肅

公薨

昔在英景朝天步實多艱矯矯一巨公降崧自鍾山受
脈奠遼海飛檄掃南蠻再入司統均晚際一何殷不詭
亦不比侃侃曹石間遠邇苞苴絕旦暮軍門閒左掖造

膝歸屹然冠朝班眉壽古所希榮名安可攀

故榮祿大夫少保吏部尚書華蓋殿大學士贈特

進太傅商文毅公輅

商公一書生三表羣英冠偶然值屯夷遽爾叅渙汗中
躋乃復起不脩睚眦怨嗣李務含宏佐彭出謀斷密雪
廟社功景皇復昭煥力發肘腋姦權璫稍知憚事違奉
身退脩然嚴灘畔所以馬鈞陽懷賢發浩歎

故光祿大夫柱國太子太保吏部尚書贈太師王

端毅公恕

昔在成化朝群小為蠱惑貢橐雜苞苴中使日絡繹三
原撫炎徼抗章奪豎魄及乎鑰留畿十疏表忠直天聽
時一迴國論若有植白簡入都門傾朝為動色拂衣南
山陞過者必垂式孝皇嗣龍飛元纁慰耆德既專銓衡
寄復叅坐論席罄欬若一身讒來徼扞格高空揭太華
狂瀾迴碣石何以昭令終上公特殊錫

故特進光祿大夫左柱國少師兼太子太師吏部

尚書華蓋殿大學士贈太師劉文靖公健

孝皇昔御天九宇開人文朴哉劉文靖力欲使之淳秉
揆若無言造膝時有陳六卿握斗杓盎然萬物春及乎
彌留際千古一君臣時移道乃見事屈志恒伸高卧洛
水陽遠與文富倫九十稱地仙去亦當明神

故光祿大夫柱國少師兼太子太師吏部尚書贈
太師馬端肅公文升

馬公河嶽鍾器宏神亦王折衝東西垂屹然金湯壯秉

節忤權璫寄命一邊障晚途復登庸臺綱肅清亢中樞
借籌筭銓府推藻鏡片言折羣訐一柱抵崩浪八十而
懸車猶云無恃杖緬想成弘際令人發深愴

故特進光祿大夫左柱國少師兼太子太師吏部

尚書贈太師李文正公東陽

矯矯李長沙髫年見囊錐及乎操文柄萬流所趨歸宏
基樹層構五彩實彰施新皇善逸豫羣蠱爭媚之公卿
輒然散而乃獨依依潔身豈不佳王室玷艱危迴瀾非

所任調劑亦不訾苟存鉅公度焉恤少年譏

故光祿大夫太子太保兵部尚書贈太保劉忠宣

公大夏

茂陵志佳兵華容司職方力誅徼功士失母令得償及
乎孝皇代經營膺力剛錫圭黃河流杖鉞嶺海邦撫此
蒸黎瘼如保赤子傷君門逮遐陬磅礴皆春陽晚途徹
帝聰所披無不當造膝若一身密語沃中腸鼎湖泣遺
弓揮手白雲鄉豈無沈幾拈妖豎亂天綱身名竟壁完

令德假穹蒼

故資政大夫都察院左都御史贈太子太保戴恭

簡公珊

敬皇急治理虛懷寄羣公造膝日有陳心腑一華容浮
梁乃亞之有名無不雙愛語可易傳往往迴重瞳國體
既以尊臺綱亦從崇從容乞骸骨憮然惻帝衷有身但
殉君何必首故龍

故特進光祿大夫左柱國少師兼太子太師吏部

尚書華蓋殿大學士贈太保楊文忠公廷和

蜀江匯岷峨新都獨神王十九讀中秘雅負公輔望五十備鼎鉉遂叅焦李行皇天亦佳禍閹武肆波蕩穆馭窮遐跡居守艱萬狀用藏體猶在機密身不喪及乎彌留際經綸始聊暢片紙縛元克餘黨皆磔盡一詔蘇九垂允矣救時相事久名始易危身以奉上

故特進光祿大夫左柱國少師兼太子太師吏部

尚書華蓋殿大學士贈太保楊文襄公一清

楊公少穎脫所職在文墨倏然受邊寄頗多殷褚惑戰
守境外專安危幄中畫逆豎擅天權王公俱辟易振落
股掌間於中出奇策黃金若流水出入恣所適頗采名
流譽兼收死士力老僊術亦窮良為智者惜

故奉天翊運推誠宣力守正文臣特進光祿大夫
柱國南京兵部尚書兼都察院左都御史總督
四省軍務新建伯贈新建侯王文成公守仁

明有兩文武新建尤卓犖少多宏奇藻而抱縱橫畧抗

疏得投荒精神始收着時清出奇邁才真任恢拓唾手
收逆王易如秋振落虛懷綏叛酋藹若春磅礴信心見
良知千古開絕學頽仰宇宙內卓然負先覺却顧素王
宮堂廡殊龍蠖

故光祿大夫柱國少師太子太師吏部尚書華蓋
殿大學士贈太師張文忠公孚敬

永嘉天人表渥顏飄其鬚落湖海間垂艾薦公車屬
當帝初元尊親意未舒一疏帝心動再疏皇覽俞片喙

折衆咻五載拜三孤維時頗用壯物情或不愉中收大
璫權萬姓賴以蘇旋表開國侯戚畹從削除人主固明
斷公實贊厥圖笑彼富民侯安足稱廟謨

故特進光祿大夫柱國少師太子太師吏部尚書

華蓋殿大學士贈太師徐文貞公階

華亭湖泖英秀發自眉宇弱冠取高第雋聲菁華圖珥
筆侍丹螭橫經進白虎師道萬古隆焉惜君相忤折腰
非所論察眉良獨苦秉鐸兩巨藩賜環歷華臚佐銓復

掌禮以至入政府開濟觸巨僚勤誠結英主彼僚以敗
歸公始大攄吐萬里却苞苴黃金盡為土載觀輪臺詔
寓內皆鼓舞始收遇巷功不虞若濡雨

謁表忠祠有述

表忠祠者祠故死難諸臣若徐魏公輝祖齊司
馬泰鐵司馬鉉黃太常子澄方學士孝孺景中
丞清陳宗伯迪暴司寇昭練中丞子寧凡數十
曹者也於乎何忍稱革除哉萬厯之詔偉矣其

於植倫常表忠憤光聖德鼓士氣寧淺淺也祇
謁之餘不勝感歎斐然成章

聖皇肇貽厥元孫嗣繩其武略或不競文治所優為諸
王擅國封分布若置碁稱詔行罰賞匠意創車旗是時
上威令頗不出京師黃齊托肺腑力以身任之周叔既
遠竄齊谷復長羈北平有髡王屬尊功不卑望氣若龍
虎養卒皆熊貔削地錯已愚奪國寧所宜謀泄漢使僂
漁陽動征輦橫驅屬國胡席卷燕南垂廟謨太草草名

使乳臭兒蹀血白溝河肉骨蔽陵坻盛侯頗能軍平保
壯偏裨一此或一彼天心詎能知桓桓鐵尚書矯矯六
出奇東昌不茅靡濟南湯其池有斐天台生密勿主所
葵肆赦赦不行用間間不疑大厦既將顛一木焉能支
飛檣渡大江羣情遂乖離三輔擬勤王姚守已俘纍朱
邸獻重關將相請密期舉宮為煨燼誰辨真龍屍魏公
元勲後不以密戚移甘作請室囚竟終首陽饑始禍復
何言縱體任刳斷天台乃甚口五宗悉參夷鐵公氣猶

勁慷慨了不悲自餘諸名俊卿尹暨曹司俱懷吠犬忠
不識堯為誰而彼景中丞趨朝獨逶迤荆卿術未講豫
讓心空馳嘔血噴北風捐脛付東馗如聞九原轍故主
未可追長寢事已畢何煩論安危笑彼崩角者次第死
胥靡拂鬱二百年身碎節不虧君王沛明詔彷彿異代
思加恩錄後人所在為致祠建康殉節地羣靈當格斯
故主猶若教焉能不攢眉侑食懿園席行當待來茲

金陵懷古

金陵古都會天塹橫稱固天矯諸蒼山龍虎相盤踞所以定鼎占殊叶明哲度仲謀志分割羣英為之輔晉元保東遷亦以多才故宋武挺雄傑中原振天步晚途急鼎革狼狽沮內顧紹伯竊國權疇當永其祚梁高感家難稍近君子怒事佛不止貪諱殺反滋蠹興國名却敵其究乃自樹昇也慚君親苟得延旦暮千秋誇帝居偏安非所慕漢兵既東出明師仍北渡世有真主生寧為形勢誤

同內外守備叅贊諸公大閱有述

高皇蕩八荒金陵為帝畿帶甲五十萬寓宇攝神威軍
實雖徙燕師名故不移留守握中權今晨大合圍矛刃
相戛札四牡何駢駢炮火擊迅雷旭日煜旌旂壯夫前
獻伎丸鉤縱橫飛射士不虛發一鎬貫兩稀酒酣方陳
賞綵溢陵坻念當承平世膽勇不獲施頰仰金湯固
焉用封侯為

與羣公恭閱都城有述

恭承帝嘉命春秋閱重關
逶蛇羣公後迺遷萬雉顛青
蓋拂流雲鳴吹沸蒼烟宮闕何參差車馬日駢闐踞虎
苞石城蟠龍表鍾山高皇御六師決江蕩烽烟於茲首
定鼎萬寓悉來旋南標指銅柱北碣立闐顏嗣聖雖遷
殷亳顧可不頌盛德為金湯千祀永無騫

恭謁孝陵有述

元運昔告衰真人起淮甸車書際蕃落日月光寓縣久
道化乃成耄期駕方晏飛龍太清表蛻骨鍾山巘佛錫

讓甫成龜玉瑞先現紫氣晝夜騰祥雲謁千變恍惚列
聖朝趨蹌百僚見乾綱既北振坤維永南奠衣冠不出
游樽俎時勤薦

恭謁故宮闕有述

高皇御朱邸草創業未備南郊甫三讓北闕雄五位是
時李韓公實當蕭何寄雖謝茅茨陋終靡未央麗黃屋
屹然尊青宮從鱗次鍾嶽旦夕來千扉騰紫氣業移衆
星拱猶表宸居制彷彿殿陛間如聞清蹕至

後湖

炯炯澄湖色濯濯堤柳姿雲水相蕩潏洲嶼正參差六
季日尋兵元武集舟師帆檣蔽秋空組練射晨曦高皇
重民數堅墉四周之自非負版吏有檝不敢窺魴鯉忘
所驚悠然各揚鬢天鵝白於雪鳴聲一何怡魚鳥自相
驕游子安所之可憐水如鏡無分照蛾眉

游燕子磯即事

遙望北郭門逶迤帶崇墉東峰矗靈祠西嶺梵音宮雙闕

排雲上表裏瞰大江奇石緣其趾硯怪含玲瓏呼觴慰登
頓語笑方從容陰雲翳白日四起不周風帆檣交凌亂號
呼莫可從揮金募篙師飛檝挽危蓬起者十二三餘已鮫
腹中人命在須臾萬變靡不同夜草乞骸章晨興附征鴻
休沐歸里值大旱山池龜坼募工徙河滿之有述

弇中故饒水澄潭連曲渠今年旱暵甚魃鬼饒吾廬窟
洞走餓獺園丁焚枯魚未論水不足陡驚地有餘幸逢
八月潮滾滾入城閭五昔桔槔聲此潭仍湛如小舫媚

夕陽清光來望舒停雲相映帶纖鱗欣故居余本澤國人焉能與之疎

廣心池中有小島頗碍目境適旱涸募工去之殊

更快然

壺公對文漪中為一小嶼石笋四五株垂楊兩三樹有之固不惡無之更成趣極目增浩淼輕舸辭抵牾譬彼太清表纖雲絕點汙游者或不然請為明其故

有瘦瘠比丘拖丈八鐵鍊蹢躅行街市間不從人

問衣鉢而日候余冀得一言之贈憫而應之得

一百廿字

有一苦行僧鵠形尼乾面丈八鐵銀鐺項鎖復腰纏胡
跪合掌言沙門有深願不愛摩衲衣不乞伊蒲饌公是
白尚書靈山舊法眷為我施片語欲作西歸傳我已墮
疑城地獄急如箭斗大青蓮花對眼未能見汝縛汝自
解無縛汝從便有言添汝縛無言當汝薦何煩賢聖偈
况乃凡夫諺勿學文暢師生買昌黎錢

侍御京山孫君既以績最贈其二尊人矣尚以不
及終侍為永思之圖以志感王子歌以寬之

御史臺中栢啞啞烏夜啼返哺既以乖風木不寧棲子
心安可窮物理故難齊戔戔京山阡上有黃金題丹綸
標玄德彤管寫青閨誰云二枯骨忽若吐雲霓我誦孝
終篇不為御史悽

題鳳麓圖為姚使君賦

消搖朱雀桁棲托烏龍宮下有百頃筠上有千尺桐彩

翔西北來丹霞敞長空寧非希世瑞阿閣不見容感作
解谷鳴鳴聲何離離俗耳故寡諧伶倫安所從我欲譜
此曲此曲不忍終

耿大夫入為司徒領太倉事時余方上書乞骸賦
此贈別

白日麗中天氛翳浩縱橫饑虎欲齧人何必避豪英夫
子邦司直焉能不持衡抗疏排九閤天聽時未恒徙公
大司農欲以平兩爭伊余非良璧委路任青蠅但令識

者憐甘為忌者憎公其振霄路余當返巖耕

其二

大道無町畦萬類時並育苟非日相齧焉在傷局促余
豈工官人逝當返空谷嗟此堯湯世三歲穀不熟所患
已剥膚豈惟僅蒿目矯矯耿壽昌常平初見屬渙汗今

大號屯膏古明勗竊因有氏言君以百姓足

時余方
避言

章丘張虞部子發考績便道歸壽其父母為成古

體應之

我昔游陽丘其土秀而豐近有女郎山遠有丈人峯
為芝與蘭揚芬於帝宮鳳皇從北來口銜紫泥封雲霞
光照耀山峯對龍從堂上雙鯨鳴音聲何雖雖製錦為
綵衣割祿充朝饗俱稱千金壽行樂浩無終

不佞故嘗為冢宰楊公歌桃花嶺矣復以郡丞王
侯請得五言古體一章知公夢寐茲嶺當不厭
余言之瀆也

仙人至東海遺此瑤臺核誰云下土薄種之不遽植二

月三月來千枝萬枝折懸旭恒炫晝蒸霞仍爛夕雨過
媚紫瓊風迴碎紅珀四皓豈避秦偶如武陵客攀條掇
其英樂與同顏色何必結實成然後生羽翼却指上林
春春光漸狼籍

吳子故泰伯之後思追至德自名曰守讓而別號
吳荆余為賦之

泰伯讓天下竄跡在荆蠻虞仲表從兄文身志亦全季
子讓其國歸耕梁溪田當其欽然時自制造物權奈何

後代人役役錐刀間仰慚神明胄俯愧夜氣專吳生感
至德千載思齊焉無欲道恒尊不競心故閒吾聞之孔
經當仁在師先

由太平堤詣省作

晨出太平門褰帷太平堤不知身上下蒼山時高低右
鑑渺平湖左袂匯清溪殘綠稽芰荷小白散鳬鷺是時
秋始暮風物繁以淒迤邐貫索垣愀然念園陞冥冥天
就寒冉冉日沈西首領且不顧焉問母與妻比屋苟可

封咎繇亦易齊

小汎入三台洞

浩蕩萬里流屹立萬古壁下有鮫人居沈冥不可識真
宰欲獻奇衝波為洗剔恍爾日御來呀然坤維圻雲去
挾飛檣濤來濺坐席礧隈涸細鱗雪乳縣伏翼四顧若
已窮傍有梯空石與客傾一卮呼童進雙屐陋矣三台
名此豈五丁力

別留都諸公卿大夫

君王眷故都所命必國楨八坐饒耆喆叅陪皆俊英皎
皎素絲風藹藹披赤誠不以管蒯微懼愛若同生宴游
恒相籍有吐靡不傾緬懷止足分休沐荷時清桑梓有
餘暎鵷鴻尋夙盟揮手謝羣公努力贊休明跡遠心不
睽何慕在合并

其二

爰居饗魯門藐藐念大荒枯藿因風起雖高故不長余
本山澤癯晚收竊巖廊夕陪鸞鳳棲朝與羣龍翔荏苒

歷再秋鬢髮日以霜萎菲亘天至其究乃我臧歸計業
已成離思故難忘願垂金石契申此繾綣章

太宰前司寇陸公少司寇朱公中丞石公廷尉陳
公同鄉右宗伯趙公太常顧公及蘇侍御湯考
功俞駕部孫右軍諸君追餞攝山棲霞寺遇達
公小談

夕奉賜骸書晨趨古蘭若候舟少滯留斂跡棲寂冥午
景懸松杉金紫忽縈絡上宰追古懽三卿示哀托及我

維桑友結蘭誼不薄款款續緒言厭厭恣深酌羈鳥快
摩空猶然懷飲啄非繇聞士喻疇為脫纏縛寧直解離
憂兼忘思歸樂

別秋省諸郎

少習城旦言謬竊文苑跡晚途不自意秋省忝常伯
我貫索垣一星化為客諸賢感誠契送我太平陌言別
無期會我衰何足惜曾氏語哀矜楊公稱不惑此身勿
易視此日勿輕擲勿以簿牘繁於心生別擇心境苟未

光詩書有徵繆

客中貴談中軍朱大夫王光祿追餞棲霞有作

歸轍何所愛愛此中林幽感歎我良友驅馬迫相求晨
供伊蒲饌晚橐出珍羞貴人徇新知涕泗縱橫流中軍
追故懽煢然若無儔慷慨朱大夫誓欲命扁舟沈沈王
光祿悔不昔綢繆志士歌伐木顏老戀首丘誠知中腸
異別淚不可收

恩許歸田重過攝山棲霞言念舊游有感因扣達

觀法師


前歲棲霞來萋萋怨芳草今歲棲霞去恰恰欣黃鳥來
似江總持去則明僧紹偶然分別心山色成醜好出處
何足言生死尚未了欲了此一關應須叅達老

為王學士題金雞山

山作金雞鳴海收銀蟾魄俄頃天地開五嶺同一白主
人不雄冠委蛇備其德為草形竿赦時儔玉堂直異日
拜相晨不驚翰音翼

題琢庵卷贈白大夫

白玉白於雪琢作芙蓉觥雲龍隱成粟煜煜夜光明一
朝獻秦廷價奪十五城矚然絳州守何異此壺冰



弇州續稿卷八

欽定四庫全書

集部

弇州續稿卷九

十九

詳校官編修_臣潘庭筠

中書_臣劉源溥覆勘

總校官進士_臣楊懋珩

校對官檢討_臣郭寅

滕錄監生_臣藍嘉瑄

欽定四庫全書

弇州續稿卷九

明 王世貞 撰

詩部

七言古

題昆山精舍是潘中丞讀書處

清遠吳興古山水
昆山去郡不十里
一塔飛英到峰墮
萬井炊煙並雲起
梁國才人柳侍中
構亭爭勝白蘋風

崇陰欲盡兔葵出千載風流指顧空彷彿山靈訴天帝
遣作中丞讀書地洗硯池含星斗文題詩壁吐雲霞氣
脩廊複閣冠坡陀美蓀蒼藤衣澗阿花如懷縣齋前密
果比閒居賦裏多我歌一贈毘山長為是浮家易來往
糟丘好釀三百斛莫遣王猷信仍爽

奉壽御史大夫楊公五袞長歌

余未獲識楊公面第聞其德業朝著勲名鼎彝
私心慕嚮之欲有通而未及也公今年五十而

余已加二適里中子張復至自帥閫謂余解天
雄雖不及待公薄有交承之誼謁一詩為壽不
揆鄙陋遂成長篇酒間倘命張生雅歌奏之亦
祭征虜佳事也

公不見楊伯起關西處處稱夫子四世猶傳掌武冠千
秋尚說銜環里又不見楊樓船銀黃若若懸腰間已驚
三組冠朝列復展百里家函關公今自是名賢裔少小
長懷請纓志天子臨軒下璽書單于遠塞知名字有時

掃氛瀚海頭有時奪幕王庭秋浴鐵爭聽白羽扇賜金
仍侑紫貂裘遼海波澄塞烽熄降將轅門但嘖嘖從爾
和我魏大夫我自屯田趙充國初登服政鬢未霜已聞
召命出明光萬八千戶徹侯印二十四考中書堂野夫
恨識荊州未倘公偶記交承事試言文舉報曹公公今
五十余加二

戴仲德善詩酒過余吳中尋當游楚乘醉歌以送
之

我不能學郗氏子為安道營剡下宅令汝四明老狂客
又不能學吳趨兒為仲若卜吳中室令我湖山長秋色
惟有新詩書卷頭送汝扁舟凌七澤楚天看盡歌歸來
少文故事亦快哉壁間指點舊游處一處同傾一百杯

公瑕為余書道德經戲謝

墨壤村頭夜雷雨敕取真文向天去天上唯貪逸少書
人間豈斷伯陽語周郎妙攝山陰魂一掃重覩五千言
厭說籠鵝成故事揖余袖手返吳門

題王叔明湖山清曉圖

誰捐吳綾寫蕭瑟乍看無乃王摩詰即非摩詰或思訓
敢謂黃鶴樵人筆黃鶴夜半不肯眠欲換凡翼求真筌
吸將三斛碧沆瀣吐作八尺青嬋娟空青濛碧猶未已
似有天雞喚山起零露枝枝瓔珞珠初陽處處葡萄綺
問余展卷胡留連欲言不言心惘然市朝少選車馬急
方信此中殊有天

題栢舟畫卷贈高母

誰言衛風蕩乃有共姜婦誰言吳趨薄亦有高令母當
時髣髴歌栢舟今日青燈照白頭縱令淇澳清徹底爭
似胥江不肯流

輓雪林趙老

偶然一作侯門客懶向侯門借顏色偶然一藝能通神
懶向人間稱藝人南陽杞菊甘谷水前身恐是天隨子
誰言見畫如見君石頭城外多愁雲

張守有溫甫學士擘窠書老栢行余以仲昭太卿

畫竹配之時萬歷丁丑之八月廿五日守誕辰
也眷屬在里中將有就館者併以為祝

君有溫甫手書老栢行槎牙爪距八法鋒縱衡我貽仲
昭手畫竹數莖鸞鵞舞葉葉排空青欲將此竹配此
栢挂君高齋八月動霜色勁節原從造化留虛心豈仗
栽培得竹既嶮谷十二聲一一將向朝陽鳴栢亦鬱作
蒼虬吟和出萬古蕭龍音飲君酒上君壽赤水三條珠
在手更聞阿段報山陰夜雨龍鱗穉中剖

贈鄭山人

田父歸來畏爭席生不能學天目徐卿典衣沽酒長醉
客舁園勺水一拳石又不能學太湖三萬六千頃洞庭
七十二峯粘天插天碧鄭子移家西洞庭雅與徐卿稱
莫逆人生獲此二絕良以快忽復擔簦剝啄破我衡門
色汝既不願作萬戶侯又何必要識韓荊州牛腰一束
盡行卷快語自足誇千秋男兒脚底路何限內則五嶽
外十洲鄭子黑髭鬚其根雪千莖飲酒不三勺盎然雙

頰頰口如崩峽江濤傾嘖然一笑謂我勝徐卿謂勝徐
卿已非偶復謂弁園自佳豈復須洞庭亦知前言戲我
耳君不讀蒙莊子斥鷃搶榆大鵬九萬里逍遙之游竟
如此

褚臨蘭亭歌用舊題定武韻

溫奴誤躡驪山陌上帝依然秘真蹟欲窺日表少傳神
但覓雲仍便灾石河南急利射雕手除却率更誰勁敵
隻字寧輸永師貴八法疑從白雲獲縱令學步太嬋娟

肯作重儻依俗格顛米何勞據舷取王孫已為炊玉易
對展雙疑雕鶚翻別看總是雲霞色未從道士換鷺羣
要與君王留馬式元章蘇本有馬式語小儒豈解襄陽狡偶然弓
失偶然得枯樹支屏未為重定武經鏡亦非匹即容懷
瓘中下估試與紹京千萬直笑殺蕭齋一字蕭少室山
人為賣宅

壽顧翁七袞一篇

顧翁靜者壽有餘鬢毛未霜頰尚朱園如辟疆客不孤

夾池翠竹庭蒼梧有鳥五色雙鷓鴣雛少者雖鳴覲清都
其一息羽需搏扶翁今不樂何為乎毋論古稀古所無
呂別駕貺佳酒冠絕諸名家因作長歌謝之且訂

後約

野人睡起春冥冥手書數卷皆酒經秫成雀鼠已多耗
醅熟兒童先不醒以茲賣文有餘錙趨向陽昌問酥醺
呂君妙得儀氏法桑青之中饒典刑勺勺流霞出缸面
點點湛露開靈扃丹田去路有餘潤華胥返駕無留醒

徐傾細醕窺妙理焉用絲竹蛾眉青報君新詩與君約
一月須酬雙玉瓶不然持螯卧甕側有繩可縛長庚星

宮詹求美長兄七十歌以壽之

我兄昔年二十餘禿騎大宛汗血駒手談不愛東山墅
角觝能雙西域胡自從折節攻經史老作公車數奇士
十上空瞻光範門一官久滯長千里耻言越甲鳴吳軍
奏書自試俱報聞挂冠神虎動天聽賣劍買犢耕春雲
歸來但讀神仙傳中夜披衣事脩鍊子午功成姹女歸

庚申守罷尸虫變以茲左肘生楊枝短髮蕭然時杖藜
乘興看調支遁馬治生親養祝翁雞酌兄大斗為兄醉
莫論七十年間事白日須同我輩長青雲且任兒曹致

竹庄卷

吾宗雅語世所聞何可一日無此君汝今卜居但種竹
凡卉不敢驕相羣籜龍個個迸春雨尾鳳枝枝干碧雲
晨呼阿段汲溪潤洗出瀟湘雙淚文慎莫學辟疆驅大
令又莫學張廌逃右軍扁舟但過賢俗士把臂相將醉

夕曛

周稚尊忽欲游五嶽留我山園少時得一歌為餞

且留之

周郎舊是菰蘆人北不能過長淮一問津忽然瓢笠別
我去脚底五嶽青嶙峋吾聞太華不可上望裏蓮花猶
未真恒山斗削大荒外其陟往往飄邊塵嵩高似宋襄
偶然執牛耳兵力豈足當吳秦何不西入蜀置足青城
問絕頂雪嶺遠拂蛾眉顰先朝特進太和秩神宮帝闕

紛金銀羅浮障色避冰霰匡廬斗柄搖星辰有山何必
盡五嶽尚殘天柱稱崑崙周郎且暫留醉我祇園春但
石如拳水如盞芥子可以藏吾身君不見大鵬九萬鷁
僅尺萬古並作逍遙論

王司訓被獎

先生昔年曾拜章擬復古樂施明堂先生今年坐臯比
要令弟子人解頤三臺使者知名姓旌語煌煌考功令
先生既是湖州人湖人可曉胡安定

寄壽戚大將軍五十

漁陽健兒日懽譟東風融冰作駝酥問誰得此造物手
雲臺大將世所無尺箠提來鞭谷蠡一書飛去掃撐塗
千兵注目鐵如意萬馬回頭金僕姑樅紫衫圍麟刻帶
萬紅纓挂虎盤符東方別獻肅慎砮西域潛輸天馬駒
帳下剖符諸部曲軍前解甲五單于緋衣將炙紫衣酒
服匿留犂競前壽彈琴峽口無殺聲挂甲峪頭多息肘
久傳名姓勒扶桑近道君王誇細柳鬢經百戰霜不辭

心為孤忠日堪剖矍鑠遠居新息上丹青肯落營平後
直置鷹揚四十年表君青社能歸否

贈休承八十

我昔避地吳閭居是時太史八十餘何人不愛虎頭畫
若個能輕龍爪書兩郎亭亭兩玉立無論箕裘世誰及
倏忽流光一彈指仲君最少今八十停雲館頭謾謾風
見君再見太史公墨池流出天地派綵筆補盡煙霞功
衰劣慚余比蒲柳辱君父子呼小友擬向洪崖借一瓢

君當滿貯長春酒

李孝甫大僕有弟常甫賓甫漸甫俱能文章以友
愛聞而孝甫多宦游不時聚首因名其齋前
之池曰看雲而乞余短歌紀之

有雲不駐梁公馬有池不洗右軍墨有池但作謝家夢
有雲長歌杜陵憶君言三弟俱好文映日補天成五色
縱令行雨少時會任是飄風散不得但使塤箎吹遏空
何必要江東日暮尋李白

贈別李孝甫太僕用張大司馬韻

蘭臺少年班仲升擲筆萬里揚霓旌自言天廐須奇駿
欲驅宛血長安行交游盡是青雲彥簪筆曾陪柏梁殿
一骨先誇臺畔求杜詩驕一骨千金立向圖中見日子罷釣
滄江潯為君高奏四牡吟出門冠蓋渺然去回首煙蘿
春正深

張子予贈余長歌感激用壯聊爾志答

張侯若乳虎少負食牛氣生平所不平舍兒比國士懶

為大將長揖人何況州司折腰吏腰間累累金符黃再
懸再掛還君王桃葉渡頭解兔鵲柳花店中脫鸛鷄寧
容醉尉呵止宿甘與侏儒共一囊雖然落魄高陽里畢
竟難呼紈袴子當懷明月將報恩入匣清霜少知己以
茲宿草荒蔣徑時復扁舟下婁水興來贈我長歌行伯
氏復與施丹青恍如輞川入我案又似易水濺濺鳴虹
雲繚繞氣鬱渟珠璣錯落光縱橫丈夫有才終有用為
汝感慨神俱竦生欲槌周子南牀死欲掘顧元公冢嗣

宗見忌雙眼色宣明可憎一面孔汝莫學灌將軍我非
竇家老禿翁偶然小醉漏消息前身自是汝南公但遇
人間失意事相將跳入玉壺中

好游歌贈游子宗謙

游生哉子好游乎吾語子游子游慎莫游諸侯戟門叱
咤風颺雞鳴上坐所未論馬食堂下能無羞慎莫游
酒人酒杯往往成戈矛青眼無多白眼出片言拱汝埋
糟丘慎莫游吳兒脫粟三斛壓汝頭日高無覓主人處

饑腸欲飯空啾啾慎莫游俠邪詩成可買鄉溫柔東家
少年袖金至頃刻雙睛如禿鶩世間遊客自暖肚那容
訴盡窮途愁毋論解竿不解瑟解瑟者可使曲曲黃金
酬游生哉子好游乎吾語子游子游何不游十洲所少
八駿扶雙輶試學陶靖節山海圖經讀再過滄溟一勺
崑崙上一杯又何不游萬古即無巫咸非汝憂案頭數
卷汝自抽誰為屈宋誰為列禦及莊周游生對我詫武
夷亦復栩栩誇羅浮縱令蒼翠射眉睫安能倒寫入汝

喉勸汝酒為我且暫留丈夫足底有八挺筆底有千秋
出何必流蘇絡繹之輕車車前何必開八騶處何必雕
甍却月之層樓樓中何必揚清謳仰面看屋梁造物恣
雕鏤老婦炊藜小兒汲人生得飽萬事休游生意沾沾
自言虛往實歸為得游弇州噫吁嘻戒汝勿復言弇州
其人倦游亦已甚日跨黃犢行春疇豈有齒牙餘羨足
世求

金蓮花艸之賤者也產錢翁懸磬室前遂獲圖之

而余戲題焉

我佛不肯跏趺坐玉兒不肯婀娜步有根難入衛軍池
有蒂難收少陵句作君懸磬室前花要使窮兒暴成富
顧節母封孺人挽章

顧家之婦由來美玉映清心澹於水筭年已重士衡詩
閨日難輕道韞比忽移琴調是離鸞從此青燈夜影寒
髮似嚴霜緣螺祝膽如黃蘗為熊九老不願中郎薦軒
服亦不願大官供梁肉唯將一片立孤心報取泉臺萬

事足

陸汝陳兄七十作長句壽之

陸翁少年頗讀書赤手那敢攀公車曾婦炊粳不解熟
陶兒覓粟安其愚自謂東吳一男子長貧不合為徂使
酒腸欲鬪灌將軍心計寧論桑御史偶然策筮游燕京
片語懸河坐上驚後閣初開王處仲青娥解贈韓君平
此娥不獨稱國色又是西來馬肝石一拂能令顏渥丹
再拂能令髮絲黑小槽壓得真珠紅金絲玉鱸玳瑁雄

誰能放筯無言好若個行杯肯放空以茲陸翁殊意氣
箕踞掀髯少流輩談鋒讓我禿塵毛眼色從它落牛背
有時高誦人相經指點顧盼紛縱橫但令一事作唐舉
何妨百客皆剛成陸翁陸翁今七十犢力駒心才十七
從今爛醉一萬場捫虱桑榆看斜日

壽嘉定唐道述六十

杏繡董氏林橘蓋蘇公井何如此君室花竹秀而整唐
勒不愛蘭臺篇唐舉不愛人相編唯愛龍宮秘藏三千

首一一留將施練川練川十萬家家盡活唐君手酌
君巨羅為君壽得意何必二千石但願為醫歲長久

奇石歌和穆少春憲副

女媧補天煉不盡錯落五色堆人寰堯波九載滌磊塊
秀出神骨爭巉巖顏崑山太巧靈壁頑么麼瑣屑几案間
不見洞庭高峯一百尺萬古長含太虛碧誰令壯士擲
天外添汝遲鴻臺畔色縈雲欲霧作變態障日撐空饒
定力穆子振奇者拜之不肯遽草草磨折簪笏拖朝紳

自言生平石交唯石君今復得此石丈成三人拜起呼
石丈汝總峻角裂缺吾不嗔愛汝蒼蒼貌殊久何似生
人老少成好醜愛汝冰雪長相守何似百卉春榮見霜
朽愛汝不笑復不言何似當面輸心背面詬愛汝不傾
復不仄何似狂飈靡草波立走石丈不肯答王子為代
之昔在長慶時牛家李家大參差我獨稱上客傀儡其
間不見疑王生謂石丈當時樓護亦如是却怪平泉汝
曹一小弟今年酒價亦太貴奈何醒我使我不得醉穉

子夏拊歌烏烏汝能出聲一和無母論穆子癖且孤王
生亦有愚公愚

愁雨歎

花徑才乾三尺地又聞雨師將雨至漫呼酒客醒後愁
先滴農夫眼前淚兩脰敲扑瘡未平一鋤蹣跚滑難致
河身甫低水勢高鉗粟垂空麥苗痺中金轉貴百物賤
賣兒可了公私事司農緩徵徵不止司空興利利無幾
舉頭是天天漠然何況君門逾萬里

郁母鄧令人八十

母年八十枕兒股兒股當年啖兒母至今母子尚一身
君王孝養慈寧春樹坊賜帛更何人

濟川舟楫圖歌贈陳侍御

萬厯天子坐明堂列公百辟何皇皇潞河伐鼓雲千檣
三吳粳稻色奪霜六師飽食懽未央距躍曲踊唱拍張
天子不復虞太倉前何後晏聲相望誰者衣繡衡漕綱
內臺所選陳侯良侯材卓犖不可量一葦可以凌扶桑

七藩之長來效長舟師十萬無跳踉如林畚鍤紛河防
片語挾纊迴寒芒陳侯三載不過鄉馮夷受職歲獻祥
無煩塞決歌宣房潘公得侯意殊強謂侯作舟行相商
爰圖惟肖志不忘而我短歌重慨慷侯其旦夕登廟廊
莫疑欲渡河無梁野塘盡日橫孤航

題望雲卷

昔時望白雲親當在其處今日問而親已乘白雲去雲
去雲來無古今丹青難寫憶親心巫山不是為雲所只

向孤兒一寸尋

管將軍懋光以註誤失官其少也嘗手擒舶酋麻
葉壯而贈之

虎軀七尺腰十圍明光鉄鎧裊錦衣鐸稍攢刺捷若飛
手挾南蕃舶王歸中軍主帥正歌舞玉帶金魚胙茅土
十年功高心獨苦猶自低眉趨幕府縱令東海不揚波
其若睢盱秘攬何一言不合文吏訶無事撫髀思廉頗
莫斬長矛作耕耒男兒可老新都里區區小酋那挂齒

須縛單于報天子
薊臺萬駟求空羣
尚書尺一論舊勲
灞陵醉尉聞不聞
轅門大旗李將軍

梅竹雙清卷歌題所藏王冕元章吳鎮仲畫也

野夫策杖村南復村北
處處東君恠消息
瞥然縞素一枝橫
又見琳琅數竿碧
一枝春之先數竿冬之後
俯仰天地間
與爾成三友
衡門掩卧不一旬
淇園大庾無精
神
樵青已侵翠鳳尾
颼母吹散玉龍鱗
賴得吳鎮及王冕
前與二友傳其真
虛堂展看僅盈尺
二友居然侍吾

側問之不言對以臆眉宇蕭蕭吐佳色吾不能學范詹
事西遣關中使却寄江南春消芳悴粉何足論吾不能
學家騎曹不可一日無所至植此君封籬護擇何紛紜
二友寓我麓儼若洛下東西兩頭屋一頭剪得瀟湘雲
一頭小貯羅浮玉鎮也九咽吐吸天漿腴冕亦磊砢節
目非凡夫扶輿清氣合此圖快矣乎快矣乎此圖此友
吾不孤

為喻邦相作容膝軒歌

喻郎一室苦竹裏南浦流雲潤湘几圖書以外無長物
僅堪容膝而已矣此膝一屈不復伸無論其下無黃金
坐處須穿幼安榻抱時但詠梁甫吟羨爾尚有腹便便
坦之不肯作梧捲羨爾雙肱力翹關曲之可詣羲皇前
但令此肱此腹安此膝勸爾百年長一室不見淨名居
士方丈間千坐蓮花千佛日

沈君五十時其子鄉進士昌期與余善

沈君不作黃頭郎行年五十鬢未蒼有子器業如東陽

賢書姓名標大桁歸來拜進南山觴守令烹雁羅中堂
里門大旗當風颺擬金伐鼓奏絲簧客稱既醉主未央
但令玉液盈銀缸明年之樂不可方

壽濮翁七十以翁子部將張雲翼請也

將軍劍術世稀有出匣風霜吼晴晝十年不試成地僊
有髯絕羣繼其後智何必挂陰符口貴何必懸金印肘
健何必搥狼頭轟猛何必取虎牙首試登鈴閣看浮雲
欲指滄溟變春酒我有一言聊戲翁更二十載鷹揚否

題王朋梅為朱澤民畫水閣圖

孤雲夙世一畫師丹青自結元君知行逢鎮東兩鬬奇
此筆為寫無聲詩簷牙四綰天棘絲角影倒插寒漣漪
空青排闥月滿卮醉睡不記東君誰二僊僊去亭何之
有圖彷彿猶堪追即令此圖垂亦墮是水可亭亭可居
不朽況有諸賢辭

送陸茂才應貢入京

士衡初入洛蒨緌土花薄一見張司空拭作芙蓉鐔匣

中悲鳴安所施回頭且忍鉛刀欺時來直傍飛黃背萬里橫行人始知

虎丘禪堂募緣歌

我家法護捨此山給孤長者無顏色驟看祇樹遶精藍
中有青蓮生火宅誰為構堂刹之右諸方禪那來駐錫
龍王吐水供淨餅鹿女銜花依法席隻字能迴野干道
中時但受諸天食雖然却火燒不壞其奈機緣有消息
怖鴿垂棲復驚去饑鼯罷供聊竄匿分無阿育役鬼神

可容檀越慳財力偶然呼作有漏因自是人天勝功德
若疑此事無功德君其試問生公石

題趙文敏畫兩馬行

後馬斑黃前馬黑兩馬八蹄如雪白前人衫緋後人碧
後人上馬如上壁前人回首頓其轡後馬蹄驕欲前逝
一躍雙爭日月輪齊驅競吐風雲氣吳興筆底蟠權奇
前身伯樂真馬師飲齧立卧皆天姿我聞南人使船若
使馬胡不畫一小艇凌漣漪吁嗟嗟龍種骨立天西陲

壽林翁通州君雲程父也

林侯但飲通江水一旦此江成玉醴會當持壽七十翁
能使朱顏若桃李願侯如江徹底清翁亦弗祿江之盈
卽令配菽亦自媿何況天露來金莖

崇明陸叟移居吳城以上元夕生兒友人索贈

君是東海人却愛吳閭土抱得照乘珠一朝歸合浦此
珠煜煜光欲然掌上誰能不見憐來從老蚌無雙美把
向明蟾一對圓銀燈膏火千門動上元夫人親抱送他

年拂拭向秦廷十五連城玉爭重

蔡蘇黃米薛趙六家十二帖歌用少陵八仙韻體

君謨郢斲何太工宛若老將藏其鋒即令草草無凡踪

嵇生土木姿自龍非偶何必黃金蒙

書家謂蔡土偶蒙

眉山命

態嬌且豐阿環玉膚雙筋紅酒酣斜捲霓裳風爾曹往

往論纖濃莫云墨豬豬亦龍

書家譏眉山墨豬

豫章骨立兒作

翁踉蹌獨上峨眉峯翹足下瞰蠶叢空不辭墜坼蒼藤

封險絕要奪艾艾功襄陽用壯趨趨風錦衫危帽青驪

驄跳盪百戰無衡鋒耳輪躍刃足躡空紆紫佩玉慚雍
容河東密跡未易窮片石定武私其胸大巧隱拙奇若
庸挫名徃徃世耳聾晉鬼幸不悲途窮瓜分鼎立難為
雄筆塚處處騰秋虹吳興指端天與工如椽之筆回重
瞳山陰隆準真乃公傍入北海將無同八法重輕貴折
衷

題馬遠山月彈琴圖

與君試彈三兩絃中有流水仍高山與君試聽山與水

恍若泠泠合宮徵試問此聲當屬誰道人指爪如金錐
劃然一鳴天地白初月何情為誰色丹青譜出無聲琴
却借青眼成知音聲空色空人已矣彼圖我歌皆幻耳

和東坡居士煎茶韻

洪都鶴嶺太巖生北苑鳳團先一鳴虎丘晚出穀雨候
百鬪百品皆為輕慧水不肯甘第二擬借春芽冠春意
陸郎為我手自煎松飈寫出真珠泉君不見蒙頂空勞
薦巴蜀定紅輸却宣甕玉璫根麥粉填調饑碧紗捧出

雙蛾眉搗箏炙管且未要隱囊筠榻須相隨最宜纖指
就一吸半醉倦讀離騷時

和東坡潁師彈琴韻

輕澍濯月秋江平勞師五指譜雙清飛霜片片墮徵角
不辭身作爨下木朱絃詎可依朱門武陵博得安道嗔
道人胸中淨於水從此潮音難入耳

戲作反九友齋歌

鄖中大纛摩北斗鼓吹金緋擁前後豈是論交無一人

却從世外思九友自蒙恩譴許歸田此曹拂拭皆我有
新年欲來舊年去九友愈妍我愈醜偶然十日中惡酒
十日壘尊不依口偶然半月擁被眠半月不踏青山顛
雕金鐫玉科蚪篆法墨名畫珍珠船倉皇緣盡便長訣
欲攜不得悲而漣生平所讀百千卷著作亦逾十萬言
臨歧一字用不著嚙噓咄喏空茫然我恨九友輕相棄
九友笑余不曉事一生一死到頭難一富一貧翻手易
對九友者為何人汝尚不曉留汝身疇能赤手金鰲頂

空盡乾坤大六塵

弇州續稿卷九